

牧

齋

初

學

集

牧齋初學集卷第九十三

外制三

太僕寺卿吳默授大中大夫

制曰在昔久安長治之世必有骨鯁彊直之臣如觴玦之解嫌疑若猛鷙之衛藜藿名在海內望及累朝朕用慨然想見其盛具官吳默嶷然山立湛然淵停以高文冠冕南宮以素節回翔郎署議易名于典禮則出入陽秋著雅望于璽丞則忠勤夙夜迨納言封駁之日正衆議誼呶之時職思其居侃然以喉舌爲任義形于色再

三上駁正之章將朕師之不驚庶國論于有底  
比游登乎卿寺猶養貢于丘園羽儀滋章蹈道  
彌固乃以覃恩授具階於戲繼序伊始多難未  
堪人皆競進于本朝余方求助于在廟如聞風  
烈尚有典刑母壹意于卷懷其勉思夫正國欽  
哉

妻龐氏加贈淑人

制曰夫婦之義備于風人雞鳴有交儆之勤琴  
瑟有偕老之嘆百爾君子閔焉傷之具官某妻  
贈宜人某氏少以女士不勤姆師克有令儀作

配君子命之不淑溢矣長終翟茀以朝何以慰  
縗衣之歎蘋蘩可薦依然興宿草之悲茲加贈  
爲淑人責此愍綸詔于幽穸冤兮不昧尚克享  
之

繼妻殷氏加贈淑人

制曰朕聞嬰鳴之好莫如友生簪履之求不遺  
故舊夫婦之際二者兼之死生契闊尤足悲也  
具官某繼妻贈宜人某氏有齊季女來嬪德入  
修織衽而有儀操井臼而唯謹迨于臘仕已絕  
哭于陳根以我御窮尚興思于旨畜式覩新恩

于象服永言舊事于牛衣茲加贈爲淑人庶幾  
百年之遺思不與長夜而共盡

祖奎贈大中大夫太僕寺卿

制曰朕休承丕緒盼布湛恩凡我臣僚均茲介  
福今吾九列之臣里居休沐乃獨請堅辭蔭叙  
追恩祖妣用以錫孝思于無窮風廉恥于有位  
余嘉乃志著之訓辭吳某乃具官某之祖父慷慨  
慕義倜儻多奇以任俠而長貧雖屢躡而不  
悔慨有大志詒于乃孫今爾孫志節巋然覃恩  
之典猶能稽桂未俗非爾之遺風也與是用贈

具階官於戲率祖以需恩辭榮以教讓傳之彝  
典著爲美譚豈不休哉

祖母孫氏贈淑人

制曰詩不云乎孝子不匱求錫爾類夫臣之孝  
移于君也婦之孝移于夫也孝之爲德錫類自  
天雖在沒世必有譽聞某氏乃具官某之祖母  
克謹內行動應閨彝移孝敬于夫家事尊章于  
篤老宗族稱孝閨門化之施于孫子資以作忠  
令德藹然再世滋大茲特贈爲淑人我有訓辭  
表于幽宅崇臺綽楔何以加諸

父鵬先贈奉直大夫禮部祠祭清吏  
司員外郎加贈大中大夫太僕寺卿  
制曰人才之生原本有自凡志節之茂著必風  
氣之先開如燧于火如鑒于水默喻爲壹非有  
使然贈具官某乃具官某之父倜儻負奇修潔  
自好孝友急難茹荼蓼而彌甘孤特寡援老蓬  
蒿而不悔抱遺經而教子引古人以爲師命筆  
丹鉛博喻出蟲魚之外矢心白首風期在牖戶  
之間爲我盡臣率由茲訓悵詬言之已遠儼徽  
範之猶存是用贈具階官非獨示教忠之規用

以爲壹行之表

前母施氏加贈淑人

制曰今吾臣子推恩必及前母揆之典禮無可  
考見而先河之祭自葉之恩有攸寄焉凡以教  
民厚也贈宜人某氏乃具官某之前母仔肩壺  
彝率由圖史拮据荆布閔不逮于春華黽勉歲  
時溘已先于朝露幸矣其追恩之子乃在所不  
知之人蓋簪履之棄捐猶不能遺忘于舊故而  
梧棬之戀慕安得有限隔于裏毛茲加贈爲淑  
人用以使觀感之人衆著于水木之義

母陳氏加贈淑人

制曰名材之生必依喬樟簡珠之蘊不在瀟流  
旋觀哲乂之興必本娵賢之德休有華問在其  
沒身贈宜人某氏乃具官某之母稟德靜專結  
心貞淑少勤濯概謹婦式于蠶桑長服井春操  
家門而荼苦辛勤十指每中夜而篝燈顛頓一  
身恒計日而并食嗟相夫之多閑乃教子而有  
聞藹然麟趾之風本其仁厚肅矣羔羊之節似  
彼安貞我有寵章遡其聖善茲加贈爲淑人惟  
此形管之美傳之無窮庶幾白華之悲釋于有

求

太僕寺添註卿管京營少卿事畢自  
嚴授大中大夫

制曰朕嗣守丕構瞻顧封疆每思折衝之臣稱  
吾臨遣之寄其有文武大略久著行閒邊塞威  
名暫居卿寺者朕之錫命豈有愛焉具官某質  
性廉直姿材敏明自理官而陟水曹載膺民譽  
歷臬藩而推卓異三奉璽書逮入西陲益騰宿  
望山川諳習撫長城湟隴於聚米之餘種落畏  
懷臥羌羊胡馬於儲胥之內圖像競傳于板屋

萬帳知名軍容留鎮于並邊諸戎鼙指乃登九  
列作我僕臣秉心塞淵允叶元年之頌錫馬蕃  
庶正當晝日之時式伸眷倚之懷聿有便蕃之  
命乃以覃恩授具階於戲王師在野賊壘未平  
當爾釋干戈參廊廟之際是吾聞鼓鼙思將帥  
之秋我馬斯臧旣有聞于卿月在師中吉且上  
應乎將星爾往欽哉朕有後命

妻胡氏仍前封

制曰人臣之任閫外也猶女子之任閫內也古  
之卽戎者曰內政無出外政無入則寢門之業

豈不亦有助于疆場乎具官某妻累封淑人某氏溫恭叶德雖肅爲儀佐誦讀于寒窓相高寒于臚仕爾夫子馳驅奉晉數歷邊陲而爾能寄軍令于向屏風清鈴索親女工于織薄氣震鼓桴曰惟女能相在爾室茲仍封爲淑人爾夫子有師中之寄爾之佽助于閫內者將與膚公俱奏可不懋哉

祖忠臣先贈中大夫陝西布政使司右叅政加贈大中大夫太僕寺添註  
卿管京營事少卿

制曰古之有鼎銘也以稱揚其先祖之美而著之後世則夫子孫之有勳德而追美其先自義率祖亦禮之經也贈具官某乃具官某之祖父精金未鎔良玉不琢馴行孝謹家傳潔滌之風根本農桑手創詩書之業瞻予卿士惟爾聞孫于公之門已高巋然綽楔畢萬之後必大蔚矣雲仍是用加贈具階官酬而劬後之勞示我流光之報

祖母王氏仍前贈

制曰詩不云乎蒸畀祖妣以洽百禮王者所以

事其先也今吾大寮亦得用此推恩之典所謂  
自上而下者與贈淑人某氏具官某之祖母頌  
圖叶德賓祭飭躬風雨饁耕具有家人之禮法  
農桑創業用培絃誦之本源偕老難見于百年  
餘慶有光于奕世茲仍贈爲淑人尚思介福于  
王母無忘修力于冲人

父木先贈陝西布政使司右參政加  
贈大中大夫太僕寺添註卿管京營  
事少卿

制曰士抱遺經于一室讀出車撻伐經營告成

之詩豈不願于身親見之乎已不得而得之其  
子有志之士爲之默舉焉累贈具官某乃具官  
某之父學窺墳典行應範模飲水盡歡孺慕有  
聞于白首舉火市義好施不問乎黃金肆有後  
人繼其大志虎鈐祕卷發揮篋笥之書龍塞宣  
猷茂著揣摩之略是用加贈具階官節鎮方新  
于臨遣威靈默贊其折衝

母劉氏仍前贈

制曰古之賢母望倚門而辭伏劒者無不教其  
子以作忠也爲吾首公之臣弘濟時艱所以慰

其母于冥冥者豈有窮哉累贈淑人某氏乃具  
官某之母珩璜載德蘋藻揚芬昭婦道于組紝  
著母勤于辟績服官滋久告誠彌新絕塞馳驅  
已斷許身之志憂時忼慨常懷恤緯之忠曉我  
寶臣率茲慈訓茲仍贈爲淑人慰爾枯捲之慕  
釋吾鼙鼓之思

管理直隸天津至山海關等處屯田  
安撫遼民事務太僕寺卿兼河南道  
監察御史董應舉授中大夫

制曰爲國以得人爲急人臣以憂國爲先今吾

瞻顧多艱緬懷共濟而國有臨事乏使之慮人無急病讓夷之思朕是用聽鼓鼙而咨嗟在朝廟而嘆息肆我卿士猶有人焉具官董應舉既直且溫亦彊而義以通達世務爲學以奉公體國爲心自擢銓曹以歷卿寺回翔滋久風操愈修乃者狡夷不廷東隅失守追惟桑土綱繆之策可謂蚤見而先憂屬當烽火震驚之時遂能奮身而抗議朕不忘收復乃眷忠勤欲試其折衝之能先付以屯牧之寄爾受命往矣乃以覃恩授具階於戲撫生齒而念版章遼人固吾人

也因屯種而寓軍令遼人卽吾兵也在爾之畫  
地按圖已非一日因用以生聚教訓何待十年  
尚其策將帥之勳豈徒課農田之績嗣有崇叙  
須爾告成欽哉

妻陳氏加封淑人

制曰爲吾志義之臣攻苦食淡勞其身以徇國  
必有賢配艱難憇瘁以相成也朕深念之具官  
某妻累封恭人某氏生于德門得配君子布素  
之風被于閨門鹽之操凜于白首爾夫子爲  
清郎爲清卿其得以壹意東修無交譖之慮也

爾則成之茲加封爲淑人闕狄淳加素沙如故  
永綏福履肆余寵嘉之

祖父公義贈中大夫太僕寺卿

制曰古之君子論譏其先祖之有德善功烈而  
銘之祭器其欲稱揚其先祖也可謂至矣今吾  
臣工追恩及祖必有書命視諸其子孫之自名  
也不滋重乎董某乃具官某之祖父天性篤誠  
內行淳備規言矩步則子弟從之敬敏任恤則  
鄉里化之畜其善慶以壽後昆厥有聞孫爲我  
卿士是用贈具階官於戲惟乃孫祗懋厥績紀

于太常德善功烈皆本厥祖朕之書命尚有耿  
先哉

祖母王氏贈淑人

制曰善無不報天不吾欺以鄉里婦孺家人  
胥之行而天道罔不監觀焉用以發聞于孫子  
吾有寵章亦以著教也王氏乃具官某之祖母  
含德在躬壹儀攸備親井臼以相夫飽糠穀而  
沒齒辛勤弗懈善慶有遺施及孝孫陟于高位  
茲特贈爲淑人蒸畀斯及饋享用加謂天蓋高  
尚克監止

父克濟先贈中憲大夫太常寺少卿  
加贈中大夫太僕寺卿

制曰賢才之生譬之巨木礧若多節斯爲大廈  
之資傑然羣材夫豈拱把之積我有卿士蔚爲  
棟梁溯其家風厥有原本贈具官某乃具官某  
之父馴行孝謹厲節激昂雖在布衣慨有大志  
捐貲讓產視財賄如毫毛排難解紛以然諾爲  
生死至于版築以禦寇平糴以賑貧高岸崇墉  
建于指掌滯穗閒粟化爲社倉蓋誠奇偉倜儻  
之人豈曰匹夫咫尺之行宜有賢子以大而家

繼志事以大光洵風骨之不朽是用贈具階官  
於戲惟爾有子惟我有臣移孝作忠斯肯堂而  
肯構允文允武曰民功而國功尚其冥靈佇此  
休顯

母馬氏加贈淑人

制曰古之賢哲必有母師蓋圖頌之風珩璜之  
訓母儀克舉臣道具焉累贈恭人某氏乃具官  
某之母無非無儀共大慈小備嘗革苦盡家人  
之道責備行誼有丈夫之風惟我賢臣率繇慈  
訓貞白端莊儼華丹之弗御共儉純壹祭魚菽

而不慙先塵未昧儀範有傳茲加贈爲淑人爾  
爲賢母子爲寶臣豈惟光昭彤管亦可以具訓  
于蒙士矣

太僕寺少卿陳大綬授中憲大夫

制曰聞者官常利敝習俗競流思得秉正守義  
之人以幾疏穢鎮浮之效士多容悅此風寂寥  
誰其似之我有邦彥具官陳大綬器資肅括德  
性堅貞淵如止水之不波斷若精金之能割自  
爲邑令以及南曹擢寘外臺俾視學政奉公砥  
節謝苞苴竿牘之私守已俟時絕傳遽拜除之

竇十年高臥一旦升華牕顧親闈豈忍絕裾而出倉皇國恤遂不俟駕而行正色立朝如猛獸之衛藜藿夙夜謀國猶行旅之憂負擔惟其誠結于中是以義形于色茲以覃恩授具階於戲汲黯抗論則淮南寢謀干木踰垣而秦人偃息爾尚勉思夫正國行且收效于折衝服乃訓辭欽哉勿替

父時霖原任文林郎四川叙州府高  
縣知縣封奉政大夫南京兵部車駕  
清吏司郎中加贈中憲大夫太僕寺

少卿

制曰士有試于一命屯膏不施而光大于其子  
匪獨積習名教有開必先挹彼注茲天亦以著  
廉吏之報焉毋謂廉吏不可爲也原任具官封  
具官某乃具官某之父文章炳蔚德性溫文發  
跡賢書分符蜀地脂膏不染首周官廉善之稱  
襦袴有聞最漢吏循良之等縣車致仕歸休乎  
一畝之宮俛首受書遺予以一經之業率縣家  
訓惟我賢臣環堵蕭然坐客之寒氊未改門庭  
寂若傳家之廉石猶新睠茲黃髮之賢契我縉

礪柯風氣激昂身致于金而不以居積射利澤及三黨而不以施于取名以奇偉倜儻之人修退讓君子之行徒豐厥德不贏其躬施于後賢善繼爾志疎節闊目故知爲大廈之材駟馬軒車庶以信高門之願是用贈具階官旋觀畫日之錫蔚爲長夜之光國猶有人爾復何憾

母王氏贈恭人

制曰古之女子莫不有左圖右史之訓珩璜琚瑀之規故能蔚爲母師克成賢子朕加恩人母原本慈訓蓋尤寵嘉之封太孺人某氏乃具官

某之母柔嘉可章淵懿有度發言光于訓箴動  
容資于典禮異張宿肉敬事罔愆夜績晝春劬  
勞匪懈殉夫歿世鬻子孤生針縷之勤不忘于  
垂老魚菽之祭尤儉于宦成居然女史之風茂  
矣娠賢之德茲加贈爲恭人於乎令妻壽母固  
已生而發聞彤管漆書蓋將沒而不朽

太僕寺少卿杜士全授中憲大夫贊

治尹

制曰太僕卿貳國家用專理馬政與古稍異然  
書稱僕臣之正詩頌我馬之臧自非秉心不回

邦之司直其可與子茲選哉具官某風操端莊  
訏謨經遠作令楚澗治行籍甚如王在珮勳必  
有聲迨登諫垣益著令聞憂國之心有憚其容  
便時之策不啻出口秉金聲玉色之姿著疏穢  
鎮浮之望朕顧瞻周行擢貳大正蓋非徒以歲  
月叙進而已也而爾果能淵塞自將交脩不逮  
精詳辨馬物之屬彊敏搜畜烙之弊朕甚嘉焉  
茲以覃恩授具階夫兵興以來需馬甚急虜騎  
疾如風雨而我馬虺隤不能戰又牧監非不錯  
置也而內地苦乏馬此皆爾之事守也爾尚悉

乃心力以欵厥政汧渭之盛在吾郊垌予亦何  
愛于康侯蕃庶之錫乎爾其懋哉

妻施氏加封恭人

制曰清公純壹之臣乃心王事者其退食委蛇  
室家相貳之私人主亦有以知之矣具官某妻  
封孺人某氏秀于閨門動以儀法珩璜之訓以  
勗子孫布素之風以敕僕御爾夫之能其官爾  
勞懋焉茲加封爲恭人於戲婦人之相助其夫  
也同于賓友人主之省視其臣也近于戶庭風  
俗有不美而天下有不治矣乎

父宗翹先贈徵仕郎刑科給事中加  
贈中憲大夫

制曰書稱堂構播獲所以教爲人子者至矣雖然作室與菑獨非厥考之責也與封具官某乃其官某之父彊學勵行質有其文屯膏不施以昌其後肯構肯穫蔚爲名卿爾有子矣然而本仁祖義爾之底法旣勤而讀書纘言爾之望歲良苦矣予其可以忘所自乎是用贈具階官夫生不逢時而身食其報沒又加渥焉爾豈知其所使然乎詩不云乎愷悌君子神所勞矣

母唐氏加贈恭人

制曰麟趾之詩序以爲闢雅之應蓋因公子之信厚而原本于后妃也贈孺人某氏乃具官某之母祖風綿邈儀法肅明腴洗致養洽比逮于里鄰贊薦嘗和氣藹于媼御發其長祥篤生爾子正色歛容而不履不踐之德人皆望而儀之則豈非爾之胎教者周而娠賢者至與茲加贈爲恭人朕思致成周之盛治仁及草木爾之遺休其未艾哉

太僕寺少卿史弼授中憲大夫

制曰頃者屬夷稽誅河東陷沒朕拊髀興歎願  
與卿大夫洗四郊多壘之恥凡公忠憂國之臣  
有言入告朕必知之具官某德器溫文風操廉  
辨起自邑今躋于西臺正色寡言而班行肅括  
登車攬轡則江楚澄清家居有年體望滋茂迨  
固寺服官之日正軍書交至之時而爾乃忼慨  
憂危指陳戰守崇墉樓櫓屹立目前大海重關  
廻環掌上蓋其氣吞醜虜直欲章天討于出車  
矧乃職在庶蕃何難整軍容于牧馬乃以覃恩  
授具階於戲匈奴未滅何以家爲以爾之志其

肯忘茲戎索而服我寵詞乎余不以國方蹙土  
而廢我彝章亦不以虜未渡河而忽爾儆戒有  
臣若是惟良顯哉

妻李氏加封恭人

制曰惟我勞臣必有賢耦蓋庭屏之不飭摧謫  
之無時牽內顧以繁心顧前期而惰氣此北門  
之刺所以作也具官某妻封孺人李氏嫻于內  
則秉是壺彝指龍具以厲功名長塗云邁問雞  
鳴而資告誠短檠相依臚仕有年御窮如故閨  
門如洗清風可激于埋輪言閨不踰淑慎有同

于焚草茲加封爲恭人佩此素沙之服壹以爲儀故知荆布之風終焉不替

父洪達先贈文林郎廣西道監察御史加贈中憲大夫太僕寺少卿

制曰記有之士庶人有善本諸父母而况于卿大夫乎朕作求世德發皇幽潛教必有初其敢忘報贈具官某乃具官某之父彊學有聞負奇不偶醇風扇物蘊孝友于家門和氣襲人解紛爭于閭黨終身數卷人曰君子之儒教子一經使爲清白之吏紹其素業爲我清卿十載孤貞

藉用白茅之舊累年建白發揮青簡之遺是用  
贈具階官用酬塗鹽之心爾有子矣庶叶屋楹  
之望國有人焉

母吳氏加贈恭人

制曰楊雄不云乎女惡華丹之亂窈窕也士淡  
然忠貞白首一節斯不以華丹亂者乎非有母  
師誰與成之贈孺人某氏乃具官某之母舍章  
可貞柔嘉維則饋祀而公姑交賀持家而嫗御  
咸宜攻苦服勞迄無寧日御窮屏貴遂以終身  
朝鑿暮鹽尚閔告勞于田畯輕綃綺縠終嘆爲

蠹于女紅泊然儉德之可師宛爾素風之不替  
茲加贈爲恭人永以詒女史之範不徒成爾子  
之名

尚寶司少卿袁可立授奉直大夫

制曰我皇祖化成久道遐不作人摧挫有時  
扶養無已留畀皇考迨予冲人闢門登庸猶  
恐不及具官某風簡清真文章炳蔚祥刑惟允  
執法有聞乃以震門之言旋干削籍之譴口不  
言事恥漢人部黨之名退不忘君有楚尹毀家  
之志越朕嗣服起自田間奉英蕩以周旋人咸

想望其風采歷殿陛而進止朕尤屬目于老成  
瞻茲典瑞之賢永懷仍几之託晉爾卿佐爲我  
典刑遂用覃恩授具階於戲凡今一時起家之  
人率多兩朝憇遺之老白首完節爾尚念皇  
祖養士之仁黃髮在廷余敢忘古人求舊之義  
勉旃夙夜服此訓辭

妻宋氏加封宜人

制曰主聖則臣直故思志義之臣家人利女貞  
尤賴賢明之助具官某妻累封安人某氏蘭行  
彰信蕙風滿盈當相夫臚仕之時能自勵御窮

之操及乎一朝抗疏二紀歸田風雨饁耕不廢  
丘園之禮燈窓課讀宛如賓友之期使爾夫幸  
偕隱之有人期沒齒而無憾惟此女士無愧古  
人茲加封爲宜人服茲翟茀之榮益念縞綦之  
素

父淮先贈承德郎尚寶司丞加贈奉  
直大夫尚寶司少卿

制曰傳曰子之能仕父教之忠親之成其子也  
記曰士庶人有善本諸父母子之成其親也贈  
具官某乃具官某之父行無考類言有表坊以

孝友淑其躬居家無子弟之過以忠義勉其子  
過庭多長者之言克生直臣事我 皇祖于嚴  
謹而不悔固云無忝所生遜盛名而弗居亦曰  
皆本諸父是用贈具階官於戲沒祀以仁者之  
粟奚五鼎之足云求忠于孝子之門庶百世以  
不朽

前母陸氏加贈宜人

制曰忠臣不賴寵而事君孝子不怙愛而慕親  
故禮有舊君之服而傳垂如母之文國家異數  
霈恩推及前母教孝勸忠率用斯道贈安人某

氏乃具官某之前母行應箴圖動循珩珮新昏  
燕爾中道棄捐哀哉若人命之不淑乃無子而  
有子得因親以及親比及一年遂膺再命茲加  
贈爲宜人於戲以爾子之于爾毛裏漠然枯捲  
何慕顧此禮編之錫曾不閒于烏鳥之懷是知  
簪履之遺益無解于龍胡之痛用章誘勸非我  
恩私靈其有知尚克享此

母安氏加贈宜人

制曰爲人母者或賢而不著于綸綺或貴而不  
昭于管彤其能兼而有之幾何人哉贈安人某

氏乃具官某之母蔚爲女士實惟母師機絲閒  
讀誦之聲七著著平反之教迨抗章之怒未測  
而偕隱之願不違歡然舉觴喜常在于目下慨  
焉太息想齊名于古人宜爾娠賢作吾遺直茲  
加贈爲宜人灑闌之表未艾于今介山之封有  
光誰昔

尚寶司少卿王之寀授奉直大夫

制曰朕嗣服以來念我先帝往居儲副備歷  
憂危惟昔年調護之人多今日登庸之士龍胡  
莫逮鴻羽日新顧彼周行爲之愾嘆具官王之

宋風期魁碧志節激昂歷邑宰而稱能在刑曹  
而有執乃東朝藐躬之日正九廟震驚之秋  
爾猶能窮究要辭抗言奸狀我皇祖是以有  
慈寧之召而舉朝得以釋宗社之憂惟爾孤忠  
著于易世還追奪之恩命寵以訓辭起淪棄之  
餘生置之禁近蓋隻身嚴譴固聖朝養士之深  
仁而一旦召還亦皇祖安儲之本意致其忠  
愛爾方感痛于山陵思其著存余尤瞻顧夫簪  
履乃以覃恩授具階於戲惟靖共爾位可以繼  
前修惟夙夜在公可以終後譽尚終念生全之

德其無忘死諫之時欽哉

妻孔氏加封宜人

制曰朕觀古忠臣志士身名坎壈而妻子流離未嘗不惻然傷之今吾追念先朝召還遺直而分榮及其室家國家寬大之恩顧不著與具官某繼妻封安人某氏女圖母越婦道可宗相夫子以能官奉先姑于篤老迨抗章嚴譴之日正閨門皇恐之時環堵篝燈晤對有同于賓友田園餚餉沒身何羨于榮華是以雷風之震驚不廢瑟琴之靜好國論既定閭範滋章茲加封爲

宜人爾其言念國恩寵勉內治砥節必期于衰  
白立名相勸于汗青服我訓辭永綏福履

父登洲累贈承德郎刑部浙江清吏

司主事加贈奉直大夫尚寶司少卿

制曰國家激勸臣工莫先恩命以追奪爲辱則  
尤以補給爲榮至于牽復未幾而褒冊相逮度

越彝典佩服異恩移孝教忠顧不美與累贈具  
官某乃具官某之父天性剛方人倫篤厚抱遺  
經以究終始業不在于蟲魚負俠骨以游里閭  
志安知夫鴻鵠慨有大節傳之後賢惟茲法署

之危言實乃家庭之遺教奮一身以爲九廟子  
可下報其先人禡一命以及九京父亦何憾于  
沒世迨國論之既定肆恩命之載頒試觀日  
月之昭回言念雷霆之摧擊人心不死何待三  
錫以爲榮天道有知豈曰十年而不復是用贈  
具階官於戲是父是子惟孝惟忠徵于本朝固  
當垂之掌故爲觀後世尚亦視彼冊書

母趙氏加贈宜人

制曰古之賢母劬躬壽後其後必有砥節立名  
之人以顯揚其親我有賢臣率由慈訓贈安人

某氏乃其官某之母言不出閭德宜爾家範勉  
相夫有雞鳴儆戒之義恩勤鬻子有蝶羸負化  
之仁既娠賢而有聞遂收華而長逝惟爾令子  
茂著忠賢奮爲死諫之臣志義有光于彤管祀  
以仁者之粟顧養何慙于白華茲加贍爲宜人  
於乎遡今古之榮名惟忠孝爲不朽不獨著珩  
璜之教亦以垂巾帽之規

尚寶司卿歸子顧授奉政大夫

制曰尚寶之卿掌司符璽夾侍殿廷其班行最  
爲清切非其人名德老成宜在帝左右不以處

焉具官某德器溫文訏謨經遠初在綸省已謝聲華旋登掖垣益章體望蓋爾之正直忠厚本諸先民而吐剛茹柔乃其素守當徑竇奔趨之日遭彼周行處羣言沸湧之時默爲精柱縣歷滋久簡用惟新列在清卿職司尚璽出入殿陛還顧瑣闈獻納之班回翔禁嚴彌覩夙夜在公之節甄唯惟允資望聿先乃以覃恩授具階於戲世變風移所貴得沉實守正之士尊賢求舊庶幾倡靜共爾位之風尚爲吾之典刑以勉須夫不次欽哉

原任左春坊左庶子兼翰林院侍讀

馮有經贈禮部右侍郎

制曰我先帝儲闈日久育德通儒踐阼未幾追懷舊學德音不遠山陵告成顧瞻懷思潛然出涕聿舉追恩之典以終憑几之言咨爾營蒐聽余申命具官馮有經湛渥經術履中和蚤踐禁林拔自聖祖遂參講幄侍我先皇誦文王世子之篇有裨寢門之孝非唐虞三代不道無忘東序之規啓沃有聞勤勞茂著胡收華于朝露徒齋志于辰猶昔在先皇爲之三嘆

惟余冲子悼以百身是用游越宮僚峻副宗伯  
漏彼下泉之澤蔚爲儒者之光於戲涕泗何從  
言念春宮之舊事話言猶在追懷青殿之執經  
尚與享于在天誠何憾于入地靈其不昧鑒我  
盡傷

諭祭原任左春坊左庶子兼翰林院  
侍讀贈禮部右侍郎馮有經文

惟爾蚤踐翰苑游陟桂坊事先帝于春宮若  
甘盤之舊學蓋亦馮翼孝德之士不獨章句誦  
說之儒回翔有年奄忽長逝霜天雪夜尚想遺

忠鶴禁龍樓遂成陳迹悼弓劒之已往念簪履  
之如存瞻我先朝式章異數貴茲新窯祭以共  
牢尚其冥靈歆此嘉饗

下葬文

惟爾望茂宮僚勞深講幄寵數追錫日月有時  
爾尚收斂營鬼追趨弓劒其從與享長侍先  
皇居此幽宮庶幾不朽

原任總督陝西三邊軍務兵部尚書  
兼都察院右副都御史贈太子少保  
謚恭襄石茂華追贈資德大夫

制曰閼閱在朝永念鼎鍾之績羽書旁午式勤  
鼙鼓之思無競惟人逝者可作曇言舊烈敢告  
治庭具官石茂華志慮忠純材術膚敏踐更中  
外歷著風猷蹠島寇于維揚捍強胡于汾石入  
登樞貳籌邊屏幃之間出總元戎宣威區落之  
外上首虜者二十餘章讐羌夷者七十一族再  
臨秦隴俄然星隕于營中一望節旄尚爾風驚  
于塞上睹茲鈴索之警視彼閭府之勳矧予將  
帥之臣亦有箕裘之胤乃以覃恩追贈爾資德  
大夫錫之誥命於戲肆承平之日久致戎索之

漸隳黑水白山尚留殘孽旄頭畢口未斷夷氛  
起冢象祁連猶恨匈奴之未滅將星高太白誰  
當長子之帥師推九原猶視之忠稱一人拊髀  
之意惟靈不昧服我訓辭

原任太常寺卿洪文衡贈通議大夫  
工部右侍郎

制曰朕簡召遺逸登用老成蓋將網羅武宣之  
人材修舉成康之政治虞門載闢黃髮在廷其  
不幸而淪亡余何愛于贈卹具官洪文衡學術  
醇正風操端莊當束髮以登朝迨白首而壹節

奉公體國殆庶幾知無不言言無不爲蹈道潔身則可謂三揖而進一辭而退迨我初服載陟清卿雖回翔卿寺之間實蔚爲本朝之望論不阿世抗議以存祧廟之規義深愛君盡瘁以歲園陵之禮方期枋用胡不憇遺撫先朝梓漆之材慨漸凋于再世念夙夜寅清之德恍或在于周行爾生平懷報國之心持以入地余一人懋厚終之典書而納棺是用特贈通議大夫工部右侍郎錫之誥命於戲士有令名至身沒而論定國之彝典蓋生榮而死哀惟朕言之有聞

庶逝者其可作營菟不昧尚服享哉

原任南京吏部稽勳清吏司主事安

希范贈光祿寺少卿

制曰爲國以養士爲先養士以厲節爲本昔我  
神祖野多遺賢蓋將鬱積一時之材以爲子孫  
百年之用如鳳麟之服猛鷙若珠玉之茂山川  
迨我新朝疇咨故老或有淪沒余深嘆焉具官  
安希范德行溫文風節凝遠抗章郎署力陳社  
稷之言削籍編氓固守丘園之貢窮而譚道誠  
畢世以何求退不忘君蓋沒身而後已方當召

用竟不假年。晚彼遺民。至于今日。風霜閱歷。徒知松柏之心。節目柯喬。莫竟梓材之用。爲之一涕。胡不百身。特贈光祿寺少卿。錫之誥命。於戲。考完節于生前。蓋棺始定。表令名于身後。簡冊猶新。尚念我。祖百世之仁庶。亦慰爾生平之志。

四川叙州府興文縣知縣張振德贈  
光祿寺卿謚烈愍

制曰。比以疆圉多故。奔潰相仍。余欲僇死而施生責。以致命必先。憫忠而厲。節教之事。君庸峻

恩章以昭激勸具官張振德入孝出弟經明行  
脩爲吏有儒者之風居官以保障爲事屬逆酋  
之作難數郡風靡遂登陴以授兵孤城斗絕力  
戰無援盡室自焚哀哉一死之堅貞烈于猛火  
壯矣閨門之婦孺皆爲國殤惟吾謀軍師國邑  
之臣率多保身軀妻子之輩誰無百口甘視息  
以偷生視爾一門尚汗顏而愧死是用易名烈  
愍峻秩司光致祭歲時立睢陽之廟世官環衛  
字羽林之孤異數以盼寵錫斯備於戲生吾所  
欲矧二十餘口赴義如歸國猶有人蓋二百餘

年養士之報庶幾精爽尚克顧歆

自兩制專屬館閣而贈祭誥文及武官恩  
命誥勅房辦事者據爲職掌天啓元年余  
當外制中書謨馮庶子贈官誥鄙俚不典  
有抱明月而長終之語余信筆爲改竄自  
後大臣子弟欲表章先德相率來請余受  
其辭而却其幣中書恚余侵官往憩於中  
堂中堂唯唯余不與置辨也迨今上初  
喪贈應山諸公制詞皆出詞林歷數年而  
吾邑許祭酒以謨高忠憲制左官蓋中書

抉摘其制語獻之韓城藉手以報東門之役韓城喜于斥許初不問故事云何而許亦未悉余之爲始禍也 穆廟初高文襄當國歸熙甫以僕丞管制敕一時贈祭文爾雅可觀厥後辦事者多用乙科闈入閣中亦視爲故紙不復簡括制詞日陋王言日輕閒與諸老言之相視目笑而已於乎亦可爲一慨也壬午長至後五日記

牧齋初學集卷第九十三

牧齋初學集卷九十四

外制四

工科給事中魏大中授徵仕郎

勅曰朕運撫多艱助求小毖歷選賢俊充斥諫垣安得公忠體國之臣參錯其間使風聲凜然而國是以定與具官魏大中恭敬溫文弘深肅括蔚爲民譽久在使垣周爰咨諭載驅英瀟瑣闡晉列封駁有聞蓋爾有正色寡言之風而懷淡然無我之志受寵有憂色納忠多苦言居無墮替之容進無扳援之黨先資之獻視彼周行

而如結之心形於人告朕有嘉焉乃以覃恩授  
具階於戲闢門伊始納牖惟人以緇衣巷伯之  
思勵其素節以彈冠振衣之想立我新朝誦虞  
人之箴爾尚輸忠於辛甲以鄭公爲鏡余將取  
法於貞觀益勉辰告之猷無負夕郎之拜

妻錢氏封孺人

勅曰士淡然孤貞窮通一節何暇問室家乎然  
而北門之歎未免上聞則相貳之賢蓋亦砥節  
之資也具官某妻某氏頌圖叶德棗栗告虔奉  
白髮以服勞辛勤生死却丹華而攻苦黓勉歲

時迨通籍之有年益負屏而相勵夜行多畏凜然行露之防辰告有章宛爾因風之微如茲媿德何靳分榮茲特封爲孺人闕狄之章尚頻仍於殊錫素沙之德知不改其生平

父邦直先贈奉職郎行人司行人加

贈徵仕郎工科給事中

勅曰士有沉冥沒世身不出一畝之宮而東修砥行以見於後斯所謂鄉先生沒世而可祭於社者與朕思式而表之矧其有子贈具官某乃具官某之父人之逸民天之君子內行純備儼

介圭之有章至德可師扇和風而被物因心制行非有使然博喻爲師是亦爲政乃其式穀於爾子蓋皆模範以古人青簡猶新指鬚眉而激勸丹心未死按圖像以考求攻木之教有聞匪石之心不改是用贈具階官於古有曜宜揭德以振華非朕敢私用厲世而磨鈍

母蔣氏贈孺人

勅曰敬姜不嘗稱乎君子能勞後世有繼夫愛其子而勞之不若勞其身者之以身教也爾某氏乃具官某之母性閑圖史訓奉姆師操荼蓼

以爲心習井眷而作苦抱絲貿布勤敗杼以相夫拜食易衣市遺編而教子劬躬已逝娠賢有聞封駁禁闈尚想指陳於畫荻隱憂瑣闈終懷手澤於斷機茲特贈爲孺人庶幾釋孝子之悲亦以章女宗之德

工科給事中方有度授徵仕郎

勅曰朕博求俊乂廣置言官班行載盈臨朝發歎思見正色讜言之士以幾鎮浮疏穢之風苟得其人中我茲選國有彝典先以訓辭具官某風操端莊言行謹直肅然清廟之器粹然孚尹

之姿爲今廉能冠於澤潞報政優異擢在諫垣既明且清其言不愧乎先正允文而靜立朝有慕乎前修君子之德風曰不流而不倚吉人之辭寡蓋有脊而有倫乃以覃恩授具階於戲國家以得人爲彊若虎豹之衛藜藿以一言取重若鶻玦之解嫌疑故崔公發言則淄青慙服而汲直在內則淮南寢謀爾其以靖共正直爲倡余豈以蜩螗沸羹爲患欽余時命慎乃攸司

妻閔氏仍前贈

勑曰夫婦之義始乎人倫故谷風有御窮之悲

而鷄鳴致偕老之祝朕於臣子蓋深歎之具官某妻贈孺人某氏秉是壺彝作其內治夙興夜寐躬濯慨以有虔朝顰暮鹽服井春而不解吁其悲矣胡不永年中夜傍徨尚想牛衣之感涕日月逾邁誰其翟茀以來朝茲仍贈爲孺人尚有聞於管彤知無憾於宿草

繼妻張氏仍前贈

勅曰爲吾志義之臣服官廉辨有事殿中則其相助之賢攻苦而食貧者亦已勤矣朕有愍惄其何忍遺具官某繼妻贈孺人張氏旣靜而顥

終溫且惠箴圖之訓學於先姑洗腆之供及於  
再世竭黽勉而相讀珥無光輝躬操作而之官  
衣猶穿弊光塵已往儀度有存治業寢門儆戒  
尚思夫行露上章瑣闈風規彌感於視星茲仍  
贈爲孺人不獨慰夫子之心亦以章女宗之範

父恒先贈文林郎山西潞安府長治

縣知縣加贈徵仕郎工科給事中

勅曰國計莫先於樹人家修必本於種德樹人  
如積穀以旣穫爲成功種德如力田以勤敷爲  
能事肆我瑣闈粵有賢臣原本先人著之書命

贈具官某乃具官某之父器資恢傑德性溫文  
孝養厥親牽車牛而服賈好行其德解服駿以  
卹貧篤厚深中與人無崖岸之異感槩立節行  
已在儒俠之間不羸其躬以冒厥子高吾門可  
容駟馬既有徵於里間度其旁可置萬家誠何  
恨於泉壤是用加贈具階官於戲或源或委宜  
食報於先河爾熾爾昌尚流光於後裔

母程氏仍前贈

勑曰麟趾之詩咏公子信厚之德而原本於后  
妃國家之治所以仁及草木也我有賢臣追念

慈訓娠賢素後余寵嘉之贈孺人某氏乃具官  
某之母天性鍾慈女圖叶矩易衣并日儉共迄  
於沒身洗腆齋盛勤勞萃於十指慈和藹於媼  
御穎靜化於閨門發其長祥篤生爾子無險詖  
私謁之念似其母儀有不踐不履之仁本於胎  
教茲仍贈爲孺人關雎之應旣有聞於爾身麟  
趾之徵尚茂著於爾後

刑科給事中薛大中授徵仕郎

勅曰有事殿內之臣吾所爲職諫諍資規益者  
也苟得其人咫尺丹陛執簡却立朝右屏息而

人主動容其責任顧不重與具官某器資恢傑  
風力肅明早以長才試於爲邑屢居上考擢在  
諫垣當羽書交至之時兼國論紛紜之日悉心  
條奏信志敷陳盡地聚圖有言必底於可績正  
繩直筆無論不期於矯時甫踐月請之班已著  
日聞之効乃以覃恩授具階在昔三原粵有前  
詰奏牘流播炳若丹青爾生於其鄉亦有瞽宗  
之思乎惟篤誠可以繼前修惟博達可以經世  
務爾必勉之無姑求賢於世之君子而足也則

余汝嘉

妻秦氏仍前封

勅曰周官之以六計弊羣吏莫不以廉爲主然而士君子之能廉多始於家室北門歎交謫而家人利女貞斯可以觀矣具官某繼妻封孺人某氏環珮應圖衡規合德恭大慈小朝齋暮鹽自誓以裙布之風佐夫爲清白之吏突煙朝冷坐看金闕之生塵鈴索夜闌共喜寢門之如水清班旣踐內美滋彰茲仍封爲孺人祇服訓辭永綏福履益勉夜央之間用襄辰告之猷

父約封文林郎河南歸德府寧陵縣

知縣贈徵仕郎刑科給事中

勅曰易稱積善餘慶傳言德厚流光故陰德之門必高於後而祥刑之策或授於先挹彼注茲蓋天道使然也封具官某乃具官某之父飭躬厲行陳義本仁矩行規言師孝友於千古春華秋實備文行於一身折節以爲善於家傾貲以好施於國流離載道望之如歸饑寒塞門待以舉火敦六行以重任恤既以仁厚起家本六計之弊廉能又以清白訓子凡此象賢之美誰非燕翼之詒是用加贈具階官於乎鴻羽爲儀大

顯於堂坊之後虎賁猶在試觀於殿陛之間

戶科給事中史孔吉授徵仕郎

勅曰昔稱王仲舒爲拾遺秀出班行乃動帝目  
蓋有事殿內之臣密侍瑣闈風流吐茹皆有獻  
替非獨能言而已具官某經術湛深器縕純茂  
發跡賢科兩宰劇邑所至治理風績炳然迨登  
諫垣封章屢上論事以和衷爲準籌邊以竭澤  
爲憂策皆便時言可底績至於進止雍頌敷奏  
詳雅如良璧之有邸而精金之有聲朕臨朝顧  
視念彼周行先民之風藹然猶在若爾者可以

爲天子法從之臣矣茲以覃恩授具階夫給事中在帝左右古多用履素立德者爲之而後世徒以爲言官而已朕今欲使封駁凜然殿陛動色諫官之勢不輕而朝廷日重其所以望爾者遠矣靜共爾位勿替朕命爾其念哉

妻蔣氏仍前封

勅曰婦人之貴從夫者也倘從其貴不從其賢則翟茀之榮不光而縞綦之思彌苦已具官某妻封孺人某氏環珮應圖琬琰含德異粧宿肉則舅姑忘貧荆布操作則家人屏貴惟茲米玉

之姿迄無初終之異夫婦之閒宛如賓友媿賢如是不已難乎茲仍封爲孺人服此休命不替素風蕭然瑣闈之游何異鹿門之隱

父餘道先封文林郎福建建寧府崇安縣知縣加封徵仕郎戶科給事中勅曰師道立則善人多善爲人師者有相於國家之養士者也而食報於其後又何疑乎封具官某乃具官某之父孝友成性溫栗比德家傳載廉之石菽水爲歡庭生交讓之木冠衣相代嗟數奇而不偶能博喻以爲師不收複楚之威

益衍菁莪之澤遐不作人施及其子今爾子纘  
言勵行蔚爲寶臣是則爾之成勞也是用加封  
具階官爾方白首窮經豈知章服之榮有以加  
於韋布乎先河後海國家崇本之道宜爾爾其  
善承之

母潘氏仍前封

勅曰 皇考庚戌之歲子大夫登於朝者不爲  
不多矣官於禁近者少也官禁近矣父母俱存  
者又少也兼而有之矣當需恩之際值稱壽之  
日者抑又少也於戲是不惟人之全福家之積

慶不可多遘而天地休明之氣亦有限焉封孺人某氏乃具官某之母出自德門備有儀法今爾子爲青璫之臣而爾與夫俱黃髮之老吉祥善事駢集一門可謂盛矣夫德者福之基也家者邦之基也朕旣已觀德於家又以徵天地休明之氣朕甚憚焉茲仍封爲孺人朕方有意於養老乞言之事而侍養之臣祥祉如是其尚善持之思其所感應召致也則豈惟一家之慶哉

兵科給事中李遇知授徵仕郎

勅曰乃者東夷不靖河東失守徵發填委朝野

繹騷議者率以謂議論不省則無以責成功封  
駁不嚴則不可振積習兵垣得人而疆事思過  
半矣具官某風力肅明機用周敏初爲健今在  
我近畿蔚有令名躋於諫署班行秀出如衝牙  
之有聲糾覆精明若操刀之能割至於論兵事  
之疏尤多切時務之言指顧遼山渝水之間可  
以坐而籌畫敷陳出車命將之事庶幾立見施  
行若爾者可以爲兵垣之選矣乃以覃恩授具  
階自兵興以來道謀孔多戎律利敝夷耽耽志  
目在我我睽睽目不在敵夷所以逞我所以蹙

也實爾之言無忘國恤掖垣瑣闈之地皆枕戈  
坐甲之人人咸以遼爲事斯遼事辦矣爾其懋  
哉

妻王氏贈仍前封

勑曰讀小戎之詩而知秦之婦人女子皆能先  
國恤而後室家嶄然有士行也遺風有存于其  
愴此贊冊具官某妻封孺人某氏動稟詩書言  
光箴訓籩耕佐讀甘麤糲以御窮荆布之官比  
素絲而叶德收華已舊錫命維新風動掖垣誰  
問封章於右省霜清板屋空懷茵轂於西戎茲

仍贈爲孺人尚其默贊夫德音用以有裨於王  
事

父友竹先贈文林郎直隸大名府東

明縣知縣加贈徵仕郎兵科給事中

勅曰傳曰子之能仕父教之忠夫教非其辟耳  
之謂也生而有氣誼可見歿而有風骨可詒式  
穀之似有深於提耳者與贈具官某乃具官某  
之父學有根柢言成文章驥足未展於名塲燕  
翼每勤於誥嗣以任恤教鄉里肅如鼙鼓之招  
以德義愧置浮嚴於榎楚之撻用爲庭訓施及

官方啓廸有聞規摹滋茂是用贈具階官於戲  
再世而昌既有徵於擣穫九原可作斯無愧於  
典型

母某氏仍前封

勅曰臣子勤勞王室砥節首公進而有尸饔之  
思退而有燕喜之慶一悲一喜未嘗不回翔錯  
互也國家蓋有以慰之封太孺人某氏乃具官  
某之母躬傳茂矩性稟深慈機絲攻苦於一身  
膏火佐勤於兩世今爾子旣顯融瑣闈而爾尚  
優游板輿惟榮與壽可謂兼之矣於戲王于興

師爲人臣者咸有無衣之賦不遑將母爲人子者寧無絕裾之悲爾旣勉其子以事君余當因其子以念母茲仍封爲太孺人尚其彊飯以迓餘休母重倚間以牽內顧

兵科給事中明時舉授徵仕郎

勑曰國家六科之設名應六曹東師之出兵垣尤重籌邊論將以封駁爲折衝非真心弘濟之臣曷與焉具官某心事樸忠局幹縣遠出宰西江報政北地爬剔疾苦扶養小弱可謂良吏矣頃者東事方殷兵食坐困爾新從西方來封事

數上勾稽夷虜有表餌制禦之謀勞盡戰守有  
盡地指陳之狀朕東顧旰食每三歎焉茲以草  
恩授具階夫言官筆戰於廟堂邊臣心戰於疆  
圉此今日之通患也使言官之卑牘與邊臣之  
烽堠胥用以向賊而不恤其它東方豈足慮乎  
爾典司兵垣且憂遼事良苦朕將倚以辦遼矣  
爾其念哉

妻唐氏仍前贈

勅曰國家霈恩推及家室死生契闊咸卹其私  
具官某妻贈孺人某氏溫恭媿德寵勉御窮節

衣量腹以事尊章風雨雞鳴以相夫子而不得  
與君子偕老翟茀以朝命也如何爲之永歎然  
爾夫不以絲枲而忘菅蒯之思國家不以宿草  
而遺采繁之德則爾亦可以無憾矣茲仍贈爲  
孺人膺國之再命我有訓詞從姑於九京爾其  
與享

繼妻王氏仍前封

勅曰古之賢婦克相其夫者多明識道理有忠  
君憂國之思焉不徒以織紝饋食爲能事也具  
官某繼室封孺人某氏育德名家作嬪良士撫

孤孩有莫辨之仁事君姑有在側之孝至於心  
念國恤勉其夫以急君而身留子舍代其夫以  
事父割兒女婉變之私成丈夫慷慨之節若爾  
者可謂女士矣茲仍封爲孺人爾夫方桔据兵  
垣指畫邊事爾尚益庇內政贊我諫臣爾亦與  
有成勞哉

父誥先封文林郎江西吉安府廬陵  
縣知縣加封徵仕郎兵科給事中

勅曰予觀於土風巴之人有好古樂道之詩焉  
今其遺民猶有存者封具官某乃具官某之父

被服儒素規矩古人事親而飲水盡歡教弟五  
膏火無間爾子通籍起家而爾終守幽人之古  
退修長者之行蔬食布衣宛然野老渥顏白髮  
詰彼平生好古樂道誠無愧焉是用封具階官  
於戲疏榮需恩國有彝典然白駒空谷之思亦  
攸寄焉非爾不足以與此

母王氏仍前贈

勅曰嘉穀旨酒可以養母此亦巴人之詩也朕  
推恩臣下循覽怙恃之間蓋愴然傷之封孺人  
某氏乃具官某之母相夫有佩韋之順教子有

某之父恭肅之孫孝秀之子慨有大志似其先人結繩掌故富有腹笥水利兵農爛如指掌非惟有名士之風蓋亦抱通儒之器抱道不施以詔其子今爾子竟爾志矣於戲魏公之遺笏代著清風王氏之青箱世諳舊事風流弘長非爾其誰是用封具階官爾尚傳述祖德磨切後賢使爾子之風績克媲乃祖顧不休與

每顧氏仍前封

勅曰吾聞之敬姜曰君子能勞後世有繼然則古之賢母所以娠賢而教忠者其必繇於此矣

封孺人某氏乃具官某之母家風綿邈儀法肅  
明言稱先姑服習珩璜之訓無違夫子辛勤簪  
笏之遺至於斷機之教益勤於學殖而備官之  
訓不替於宦成式穀有人誥誠彌苦則古之母  
師無以加矣茲仍封爲孺人爾子風猷未艾爾  
之優游象服往來雕軒固有日矣能勞之報顧  
不著與

山西道監察御史江秉謙授文林郎  
勅曰昔我皇祖儲養諫臣迨於末命除授如  
恐不及山陵旣成人物滋茂朕瞻彼周行蓋不

勝豐芑之思焉而需恩之典其能已乎具官某  
經學承家儒術飾吏出宰劇邑蔚有賢聲襦袴  
之謠有聞膏雨之澤滋潤晉陟臺憲風聲凜然  
虛己奉公志每存乎交儆盡忠補過心如結於  
在廷共傳且止之謠快覩巡行之跡顧瞻法從  
幸有人焉乃以覃恩授具階朕開受言路朝上  
夕下立維新之朝則當奮祓濯之氣居可言之  
會則當收藥石之功若乃埋輪示威焚草爲慎  
此衰世之事而非朕所望於爾也爾其毖哉

妻汪氏仍前封

勅曰人臣出宰大邑入陪法從勞於王事而不  
得顧恤其私則內助斯重矣具官某妻封孺人  
某氏婉婉淑儀儉共令德拮据辟績之苦宛若  
儒生追陪膏火之餘自爲賓友居寢門而治業  
龜勉中宵視封事而戒心殷勤問夜爾夫得以  
一心營職爾有助焉茲仍封爲孺人再命是膺  
初勞勿替

父應曉原任四川重慶府涪州通判  
先贈文林郎浙江寧波府鄞縣知縣  
加贈山西道監察御史仍前階

勅曰木本水原臣子承家之學先河後海國家  
追遠之恩具官贈具官某乃具官某之父行馴  
簡柙學咀英華廿載入山勵隱居之遠志一行  
作吏借宦跡以薄游涪水之歌詠猶存黟山之  
藏書殆遍作縣有譜試看廉石之傳荷橐生風  
不負簾金之教是用贈具階官嗟斯人之不作  
庶可用以爲儀

前母胡氏贈孺人

勅曰數典而忘祖非故也登枝而捐本非仁也  
朕比下詔霈恩尤敦篤於原本故臣子之有志

弗信者悉逮及焉某氏乃具官某之前母孝慈天授共儉少成黽勉備旨蓄之勤閱歷盡糟糠之苦譬彼開國承家之事實爲荒度草昧之人實命不猶溢焉先逝逮乎曠蕩追恩之日乃得均霑後子之封其可愍矣茲特贈爲孺人於戲觀口澤而思以言乎所生之子見圖像而拜豈望於不知之人推恩體及夫人情異數不限於功令爾靈不昧尚服享哉

母汪氏仍前贈

勅曰貞順賢明母儀之所兼重也古之賢母稱

於天下能教其子其可誣哉贈孺人某氏乃具  
官某之母被服圖頌不解於身諷誦詩書略皆  
上口既能食而能教亦有嚴而有慈是正一字  
之外譎取諸腹苟慨歎千秋之風義教以心師  
遂成爾子之名不愧母師之號茲仍贈爲孺人  
於戲綸綺之榮滋至而管彤之譽無窮是母是  
子厥惟顯哉

廣西道監察御史游士任授文林郎  
勅曰朕瞻顧東方拊髀太息蓋欲順殺氣以用  
兵法文昌而命將而懼未有以稱也我有臺臣

期振國恥慨有大志予寵嘉之具官某學求經  
國志在救時自爲令而循良已有聞於當世甫  
就西臺之列屬當東事之殷慷慨上書諄復論  
事孟江鑑海攬世務於目前餌虜穿夷聚兵符  
於尺幅予嘉乃志明試以功遂命爾於彼東南  
簡江淮習流之卒身親教練成越人君子之師  
用以張吾三軍期於自當一隊爾受命往矣乃  
以覃恩授具階於戲自唐宋以來往往用文臣  
爲大將朕命爾非小也非寬不可以養人非嚴  
不可以御衆非廣不可以集事非斷不可以成

功聽我訓辭著爲紀律朕有後命爾往欽哉

妻段氏仍前封

勅曰易不云乎陰雖有美舍之以從王事夫以從王事臣道也而妻道亦參預焉人臣砥節首公必得閨門之佽助豈偶然哉具官某妻封孺人某氏休有華問歸於今人躬洗削以御貧服素沙而比德爾夫子旣奮身師旅方有外憂而爾能克業寢門俾無內顧蓋不惟身甘麤糲量腹以佐養士之風抑可親執鼓桴向屏以作三軍之氣所謂以從王事誠無愧焉茲仍封爲孺

人爾其益勤夙夜以相夫子石窮之封朕不遺爾

父讓先贈文林郎浙江湖州府長興縣知縣加贈廣西道監察御史仍前階

勅曰士能詠歌一室抱遺經以昌其後斯已賢矣矧其慷慨負奇風義弘長大啓其後之人以勤王事贈具官某乃具官某之父通材膚敏亮節激昂志在春秋刊訓故專門之學下窮掌故鄙蟲魚篆刻之文嗟有志而無時終藏器而不

賈肆尚友之心於千古游於酒人韜濟世之德  
於一鄉稱爲長者惟而賢子似其先人持橐殿  
廷載舊史麟經之筆奮戈夷虜出傳家豹略之  
書蓋堂構之有聞信風骨之不朽是用贈具階  
官尚佇師中之錫蔚爲泉下之光

母明氏仍前封

勅曰臣子奮不顧身勤勞王事妻子不足戀惟  
有母尸饔之恩足以奪之我有志義之臣必本  
賢明之母著之女史休有譽問封太孺人某氏  
乃具官某之母淑慎應圖堅貞苦節寒水凜凜

哲白首以殉夫宿火熒熒篝青燈而教子燕及  
婢寡嘗自分衣食之餘斥置義田曰以終先君  
之志至於寢門之告戒必先砥節而首公日暮  
而倚間幸無以老人爲念秋高而選將當獨分  
社稷之憂肆我賢臣率繇慈訓茲仍封爲太孺  
人爾其優游眠食勸勉勳名旋觀東事之告成  
嘗御北堂而燕喜

陝西道監察御史蔣允儀授文林郎  
勅曰宋制有言在廷之臣位下而望重者惟諫  
官而已朕大弊羣吏妙簡諫官試職未幾畀以

書命其慎重臺諫猶前志也具官某器資綿遠  
德性溫文茂著循良再更繁劇乃膺師薦擢置  
西臺蒿目憂時以四郊多壘爲恥直筆繩世以  
衆言清亂爲憂旬月之間奏章數上補助政體  
皆可施行乃以覃恩授具階於戲心以御氣氣  
局恢則心益小學以經世世務達則學益深惟  
忠實可以不撓惟精誠可以不懈朕方觀爾之  
尚勉於厥修欽哉

父弘憲原任戶部貴州清吏司署員  
外郎事主事加贈奉直大夫

制曰傳稱明德之後必有達人蓋其弘長風流  
積習名教志氣可以默喻而孺染非有使然余  
有寵章表其懿德用以著教非獨廣恩原任具  
官贈具官某乃具官某之父恭敬溫文孝弟忠  
信強學博喻繙道以爲絲陳義本仁旌行而爲  
佩自膠庠而教國子以人師而爲經師歸休乎  
環堵之宮終天年而將母入官爲錢穀之吏盡  
地力以事君管榷政而指掌秋毫憂存國恤賑  
凶歲則隨車夏雨誠感人窮至其沒不忘君可  
謂死以勤事肆而令子蔚有家風澹泊自將不

改寒窶之雅志公忠憂國庶幾易簣之遺言清  
白萃於一門羽儀用乎再世是用加贈具階於  
戲節其一惠誠無愧鄉之先生祀於瞽宗可以  
教國之弟子

雲南道監察御史趙于達授文林郎  
勅曰我先帝踐阼未幾舜旌斯舉除授臺諫  
如不終日鼎成之後接踵而來皆先帝所以  
遺朕也推恩之典其可後哉具官某風義篤厚  
器識恢明往在使垣夙有令聞英簫相望於西  
北馳驅不憚夫咨訊越予嗣服之初乃就憲臺

之職雄班初滿邊事方殷風采足以肅臺端議論足以扶國是正色對仗有獨立敢言之風奮志車攻有滅虜吞胡之志朕甚嘉焉乃以覃恩授具階今日方舉國憂遼遼何足憂也韓愈身兼憲職力贊蔡州之師范仲淹起自諫官驚破夏人之膽尊俎折衝責在爾輩爾其竟爾緒言勿替朕命欽哉

妻王氏贈孺人

勅曰雷風順承易著家人之道琴瑟靜好詩懷偕老之思具官某妻某氏夙有多譽來媚德門

侍奉則總笄益虔實祭則酒食祇飭收華永逝  
遺範猶存胡不百年遂爾先封於馬鬣庶幾夙  
夜尚思交儆於雞鳴茲特贈爲孺人爾其有知  
尚克享此

繼妻李氏贈孺人

勅曰婦有相夫而不及其成亦有成夫而不見  
其盛人能弘道末如命何具官某繼室某氏善  
事君姑克相夫子篝燈佐讀有無踰仲卿之規  
推食字孤有兼倍所生之感蕭然邸舍溢爾長  
終不及見姑尚想彌留之慟無以聞母彌深伉

儻之悲茲特贈爲孺人庶幾芝簡之頌無復泉臺之憾

繼妻水氏封孺人

勅曰女德無極婦道有終迨於繼續之間滋有故新之異具官某繼室某氏德應女圖道齊師氏作鵠巢居有之配鍾螺巔肖我之慈子皆有逾於已生人亦莫辨其所出無復單衣之感彌深緩帶之思至於相貳之多勤又其淑慎之餘事茲特封爲孺人於戲鸞鳳之和鳴已徵祥於臺閣鳴鳩之叶德尤昭美於管形

父喬先贈修職郎行人司行人加贈

文林郎雲南道監察御史

勅曰古稱水深土厚無逾西秦漢舉孝弟力田  
多出三輔惟此良士佑彼後人趙某乃具官某  
之父馴行孝謹矢志篤誠帶經而鋤空勤穠叢  
於望歲釋耕而歎終期播穫於象賢惜哉有志  
而無時展矣是父而是子持橐簪筆發揮青簡  
之遺正色讜言藉用白茅之素是用贈具階官  
用彰種德之光益厚樹人之報

母蕭氏封太孺人

勅曰古稱女士亦云母師圖史之訓具存式穀  
之報不爽某氏乃具官某之母順柔以事君子  
辛勤以持門戶青燈白日積有歲年黃卷素帷  
互相磨切子旣躋於法從女亦蔚爲禮宗惟此  
嫗賢是爲胎教茲特封爲太孺人令妻壽母知  
讚誦之不慙文駟雕軒將往來之有煒

福建道監察御史李思啓授文林郎  
勅曰御史執憲轂下持斧郡國將命宣旨固難  
其人乃者賊壘未平竝邊多警以巡行之使兼  
閩外之權朕於臨遣蓋尤重焉具官某性資恢

傑風力彊明奮自循良擢居臺憲雄班初入謫  
言有聞惟雲中上谷之間實藩籬要害之地命  
爾相視衿要籌阨塞於屏障之中撫馭師徒宣  
國威於種落之外不徒近固銷鑰抑可遙壯風  
聲爾受命往矣乃以覃恩授具階於戲內以擁  
衛神京外以讐服大虜併三關而設守實有良  
規兼兩道以制夷豈無長策尚勉思夫攬轡將  
佇望於策勳欽哉

陝西道監察御史李達授文林郎

勅曰御史執憲轂下非徒聯法從持議論而已

其精神足以折遐衝其果毅足以扞禦侮古有  
社稷臣茲其選也具官某材函特達德佩光明  
筮仕祥刑蔚爲民譽峻登憲職秀出旌班頃者  
東夷不臣遼疆日蹙方羽書旁午之日正戎行  
單弱之時爾乃慷慨上書邁征就道逝將率巴  
渝之衆簡庸蜀之人雪子弟遼水之讎正夷虜  
藁街之僇有臣若此朕深歎焉乃以覃恩授具  
階於戲寢淮南之謀賴汲黯之正色正淮西之  
計資韓愈之昌言勿謂外寇之盛衰不係中朝  
之得失朕言維服爾往欽哉

妻汪氏贈孺人

勅曰士旣通顯而念韞佩之盟未嘗不愀然也  
况其賢孝有聞者乎國家蓋代爲愍之具官某  
妻封孺人某氏家有素風身多儀法雞鳴問寢  
則孝著慈庭蟲飛戒安則勤箴士行方宜其室  
不永於年官燭宵殘嗟短檠之未棄臺霜夕冷  
慨長夜之有人茲仍贈爲孺人用賁泉室之恩  
式昭管彤之美

繼妻汪氏仍前封

勅曰釐降之風邈矣二女女之曰以觀刑也若

乃元妃繼室媲美虞汭以光於有家則士大夫  
家難之具官某繼妻封孺人某氏圖史被躬環  
珮叶德應歸妹其娣之吉良祫有占爲有齊季  
女之尸采繁彌飭繼修壺政用嗣徽音問寢食  
於高堂殷勤無間嚴啓閉於內屏肅穆有加茲  
仍封爲孺人尚敦儼戒之風以著觀刑之範  
父之章先贈文林郎浙江湖州府推  
官加贈陝西道監察御史仍前階  
勅曰士有奇不售坎壈長終而發其祥於後人  
也俯仰之間有天道焉贈具官某乃具官某之

父器本特達才復經奇繁露玉杯湛深經術之學雕蟲篆刻縱橫子史之文乃不偶於數奇終自廢於狂易趙嘉之遺言臥萼竟爾無時酈炎之末命止戈終焉有子顧我荷橐之彥爲爾肯構之人是用贈具階官於戲挹彼注茲亦何憾於造物求忠移孝庶有永於前人

母方氏仍前封

勅曰婦人之殉夫也有截髮毀肌之操國家之崇節也有崇臺綽楔之褒其有苦節有加旌門未逮而獲以其子顯者則旌典與封典蓋交并

焉封太孺人某氏乃具官某之母淑慎無儀堅貞厲志當其夫嬰奇疾子在孤生供藥物於十指之中焚焚宿火操門戶於一紀之內慄慄履霜蓋殉夫於夫在之時不待寡而後寡存夫於夫亡之後乃爲窮而又窮幸藐孤之有成斬然頭角悲未亡之後死閑此歲時真古今節孝之所難乃功令表章之或後茲仍封爲太孺人於戲我心匪石白首何異於盛年有子克家彤管有光於簪筆尚永傳於青史終有待於漆書